

愈有 既以為人已愈有
右不同者七十處

德經異同字

七

道德真經章句訓頌序

談

太上老君道大而德宏守約而施博藏大用於無用之地寓無不為於無為之中超乎太極之先而不為古行乎三極之後而不為今得其高明者曰天得其博厚者曰地日月得之以代明四時得之以錯行山川得之以流峙洪者熾者高者下者飛者潛者動者植者各得其一而為萬物靈於物者為人舉不能出乎範圍曲成之外吾求其故而不得強名曰道非聖人無以有此道非經無以載此道是故道難聞因經而後聞道難見因經而後見論是經者倘有得於無為之端則可以脩身可以齊家可以安民可以措天下於太平雖然此持其粗耳南華經云其塵垢粃糠猶將陶鑄堯舜者非耶若夫性根命蒂交攝互融妙有真空微言顯說險語稜層則孤峯絕岸至未澹泊則元酒大羹其澄涵則鏡裏之花其窈欽則水中之月可以默契而不可以言悟可以神遇而不可以跡求自非別具隻眼與老君相見於寥廓惚恍間者未易影響

其萬一也吾祖正一真君兩承神馭下降西蜀親授至道發五千文言外之旨無餘蘊矣家世守之蓋千數百載嗣成統焉傳嗣累奉德音以遵行太上老君經教為祝釐第一義是以每於三元開壇傳錄告祝之餘必即此經敷暢之使在壇弟子及慕道而來者如魚飲水各滿其量然四方萬里人人提耳而誨之日亦不足矣為老君弟子而不知老君之道猶終日飽食而不識五穀終夜秉燭而不識火也不惟自負其身豈不深負

聖朝崇尚經教之意哉以是不自揆輒釋其義以為章句非敢自謂得老君之旨然使吾門弟子與夫尊德樂道之士得而玩之倘有悟入則金丹不在他求而至道吾所謂有功成行滿法身不壞亦券內事耳所謂十載而下知其解者猶旦暮遇之也凡我同志可不勉旃至治壬戌夏五月嗣漢三十九代天師太玄子張嗣成再拜稽首謹序